

楊襄毅公本兵疏議

楊襄毅公本兵疏議卷之三

覆浙江叅將盧鏜等功罪立異勘究疏

兵部尚書臣楊博等謹

題爲糾劾武備官員擁衆逐賊故不勦捕遺害鄰境乞
賜重加究治以警人心等事職方清吏司案呈奉本部送
兵科抄出巡按直隸監察御史張雲路徐敦題俱奉
聖旨兵部看了來說欽此又該提督軍務兼巡撫浙江并
福興泉漳地方都察院右僉都御史胡宗憲題爲巢
賊遯出海洋官軍奮勇克捷事奉

聖旨兵部知道欽此欽遵通抄送司查得先該巡按直隸

監察御史孫慎題爲海洋倭寇屢次攻劫類叅失事
官員以明 國法事該本部議擬覆題節奉

聖旨盧鏜革去冠帶戴罪殺賊欽此又該巡按浙江監察
御史胡宗憲題爲零賊奔突地方戕殺憲臣乞

賜究治失事官員以懲不恪事該本部議擬覆題節奉
聖旨盧鏜降實職二級照舊革去冠帶管事欽此又該吏
部咨爲海賊侵犯兩浙生民受害極慘乞

賜嚴究失事官員以安地方事該巡按浙江監察御史胡
宗憲題該吏部覆議節奉

聖旨是羅拱辰既有前功著降二級欽此通查案呈到部

看得分守寧紹台溫叅將今革去冠帶盧鏜在直隸御史張雲路徐敦則謂其嫁禍鄰境欲治縱賊遺患之罪在浙江都御史胡宗憲則謂其深入虎穴欲錄衝冒鋒敵之功侍郎趙文華亦極稱盧鏜斬獲數多緣前項倭奴原自紹興潰圍而出流劫而來始而過越徽寧直抵留都繼而突入漂水復寇蘇州爲首和尙雖被我兵戳死黨與迄今尙未盡絕先該本部議擬覆題已蒙

聖明將盧鏜降實職二級若果勒馬而還致賊感恩則是忍心害理死有餘辜但事干兩省若非直隸出自風

聞必係浙江涉相回護相應嚴加勘處合候

命下備行總督侍郎楊宜會同浙江南直隸各該巡按御史從實查勘要見盧鏜與僉事羅拱辰原領兵馬若干是否與賊交通致賊感恩先後立功果否多至一千餘級雖經降革即今仍該作何究治星馳具奏以憑覆議定奪其胡宗憲所稱副使劉起宗備倭王沛千戶吳憲武生朱先等之功并督撫各官具奏功次本部轉催巡按御史各另勘報不許遲緩嘉靖三十四年九月十八日題奉

聖旨是盧鏜等事情着總督巡按等官從實查勘來說

此

覆薊遼總督侍郎王忬哨報虜情嚴加隄備疏
題爲哨探緊急虜情事職方清吏司案呈奉本部送兵
科抄出總督薊遼保定等處軍務兼理糧餉兵部左
侍郎兼都察院右副都御史王忬題奉

聖旨兵部知道欽此欽遵抄出送司案呈到部看得總督
薊遼保定軍務侍郎王忬題稱大虜俺荅等由大同
深入山西洪州之賊見保鎮有備不敢南向惟打來
孫諸部垂涎古北冷口一帶事在緊急各一節爲照
薊鎮事體比之宣大不同宣大去京頗遠卽有緩急

兵食調度猶或可及至於薊鎮朝入邊陲夕達畿甸
二十九年縱之突入則患在剝膚遠近騷動三十三年
拒之遁退則暫得息肩旃裘震讟臣等深鑒前事
每與督撫諸臣徃復咨議大率以預伐虜謀使之不
敢近邊方爲上策擁衆攻邊阻之使不得入斯爲中
策坐視其入卽成斬俘之功猶爲下策總督王忬巡
撫吳嘉會深以臣等所言爲然以故涉秋以來二臣
振勵之詞不絕於口傳報之使接踵於道宜猷宣力
良可嘉尚但今洪州之虜早已歸巢山西之虜漸將
出境東方傳報又復紛紛而至若果糾合諸部連營

侵軼關係不輕與其臨事而失防不若先事而多備
相應通行申飭合候

命下備行王忬吳嘉會督率提督蕭漢總兵官周益昌殷
尚質等照依分定地方晝夜戒嚴必使匹馬不能入
邊方稱

聖皇委任責成之意防秋畢日容臣等查據今春保障之
功一併論敘總督官仍要明諭諸將令其益加奮迅
以收後効如或因循悞事國典具存臣等亦不敢
重自依違以誤大計嘉靖三十四年九月十九日題
奉

聖旨是欽此

覆薊遼總督侍郎王忬遼鎮告急疏

題爲遼鎮 請兵應援事職方清吏司案呈奉本部送
兵科抄出總督薊遼保定等處軍務兼理糧餉兵部
左侍郎兼都察院右副都御史王忬題奉

聖旨兵部知道欽此欽遵通抄送司案呈到部看得蠢茲
醜虜在西則俺荅諸部在東則打來孫諸部自入秋
以來即欲會合一處侵擾薊鎮窺伺畿輔因見薊鎮
兵馬嚴密以故西部分犯山西宣府東部分犯遼東
切緣遼東地方每當秋深早濕泥淖胡騎難馳所往

城僅堅完高厚攻圍不便以戰以守均有可恃但入
衛之兵今歲多至二萬有奇見在彼處兵馬委果數
少雖該總督軍門摘發總兵殷尚質前去策應猶恐
緩不及事且義州地方密邇薊鎮萬一擁衆近關則
一片石大毛山一帶隨處可入尤當深慮相應通行
申飭合候

命下備行總督侍郎王忬相機調度在遼東止當責其謹
守地方務成保障之功在薊州不可輕撤兵馬以致
乘虛之擾巡撫都御史蘇志皋候殷尚質兵到如果
賊未出境隨賊截勦以寡擊衆賊退之日總督官從

實具奏以憑覆議嘉靖三十四年九月二十四日題

奉

聖旨是欽此

奏報薊遼督臣統兵拒堵昌平虜寇疏

題爲總督重臣統兵截殺事職方清吏司案呈奉本部
送准總督薊遼保定等處軍務兼理糧餉兵部左侍
郎兼都察院右副都御史王忬揭帖前事到部送司
案呈到部看得前項達賊大營屯住懷來等處分遣
精騎突攻居庸以西唐兒庵一帶邊牆仰仗

玄威振疊官軍拒堵不得深入臣等猶慮軒撫二臣不在

昌平事無統紀萬一人心懈弛關係匪輕當即馬上
差人執牌遍諭大意謂各該上客將兵受國厚恩
宜猷宣力正在此時宜各照分定地方應拒堵者拒
堵應策應者策應必使匹馬不得入邊方爲首功自
有去歲古北口陞賞事例若因循悞事憲典具存難
以輕貸今據總督侍郎王忬先發遊擊陳言兵馬三
千前來應援復自密雲親詣昌平相機調度必能上
紓聖皇北顧之憂除候有緩急另行具奏外嘉靖
三十四年九月二十七日題奉

聖旨是欽此

請命薊遼總督侍郎王忬堵截昌平虜寇疏

題為達賊攻牆官軍對敵奪獲達馬等事職方清吏司
案呈奉本部送據署統領民兵原任叅將都指揮僉
事張勳揭帖前事又奉本部送據昌平兵備僉事馬
佩揭帖所報虜情與前相同通送到司案呈到部看
得居庸以西黑冲峪柳樹窪攻牆之賊查與唐兒庵
大石溝之賊俱係同日出沒其勢重大其謀姦狡副
總兵祝福叅將張堅張勳蕭欽昂陸禎等不惟拒之使
不得入且奪獲馬匹兵備僉事馬佩先期督脩牆塹
臨警調度兵食保障之功均為可嘉但前賊尚在邊

外向往未定除備行總督侍郎王忬等嚴加堵截務保萬全外嘉靖三十四年九月二十七日題奉聖旨是着王忬等嚴加堵截欽此

奏報昌平虜寇退遁疏

題爲仰伏

天威大舉達虜退遁事職方清吏司案呈奉本部送據固原遊擊將軍署都指揮僉事李嵩塘報前事等因案查先奉本部送准總督薊遼保定軍務侍郎王忬揭帖爲大舉緊急虜情事又奉本部送據分守居庸關等處署都指揮僉事吳守直呈爲緊急聲息事通送

到司案呈到部看得居庸關以西唐兒庵柳樹窪等處去鎮邊城十里去鞏華城六七十里先年原無邊牆限隔以故猾虜覘知率衆數萬突來侵軼不知臣等早已題奉

欽依牆塹近已漸完無牆去處品窖木簽色色俱備然猶以兵寡虜衆不敢保其萬全仰仗

聖皇在上玄貺眷錫玄威震疊我兵死傷者止三四人賊之被我火炮死傷甚多望風北遯喙息弗遑聿成保障之功稍有俘獲之績比之去歲古北之事大略相同除候遠出宣府境外另行具奏外嘉靖二十四年

九月二十八日題奉

聖旨知道了欽此

覆宣大巡按御史李鳳毛查究宣府失報虜情
題爲傳報緊急聲息事職方清吏司案呈奉本部送兵
科抄出巡按直隸監察御史李鳳毛題奉

聖旨兵部知道欽此欽遵抄出送司案呈到部看得巡按
直隸監察御史李鳳毛具題前項聲息止言賊犯宣
府之略至於賊攻居庸關唐兒庵一帶本官因隔在
外尚且不知切緣宣府昌平二鎮相爲唇齒昌平以
宣府爲門戶宣府以昌平爲堂室門戶旣嚴堂室方

固昨者賊以數萬之衆突入龍門境內信宿之間即達居庸近地宣府烽火通失傳報萬一潰牆而入南則宮闕北則陵寢關係重大不在古北之下臣等一念至此不勝悚息所據地方官員相應查明究治合候

命下備咨都察院轉行御史李鳳毛逐一查勘要見賊數實有若干何月何日由何地方進入緣何不行傳報經過地方曾否殺虜人畜攻圍堡寨官軍曾否對敵有無重大失事有功有罪人員分別具奏其昌平鎮保障之功與宣府自不相掩聽總督侍郎王忬巡撫

侍郎吳嘉會會同具奏以憑議擬陞賞嘉靖三十四年九月二十九日題奉

聖旨是欽此

覆鳳陽撫按官陳儒等會保總兵官萬表起用疏題爲保留漕臣以裨國計事職方清吏司案呈奉本部送兵科抄出總督漕運兼巡撫鳳陽等處地方都察院右都御史陳儒巡按直隸監察御史吳百朋題俱奉

聖旨該部知道欽此欽遵通抄送司案呈到部看得原任提督漕運兼鎮安淮安總兵官都督僉事萬表近奉

明旨准其養病今據巡撫都御史陳儒巡按御史吳百朋
交章極稱其賢且謂其步履雖艱漕務不廢即今東
南多事選將爲急似難聽其閑散合候

命下將萬表附記將材簿內遇有相應員缺仍爲推用嘉
靖三十四年十月十三日題奉

聖旨是欽此

覆蘇松巡按御史周如斗論罷都督何卿等疏

題爲流寇盡殄聚寇尚存懇乞嚴諭督撫重臣罷黜老
懦將官以飭武備以勦殘寇事職方清吏司案呈奉
本部送兵科抄出巡按直隸監察御史周如斗題奉

聖旨兵部看了來說欽此欽遵抄出送司案呈到部看得
巡按直隸監察御史周如斗具題前因大意謂蘇州
之寇盡行斬獲陶宅之寇黨與日多欲要嚴催督撫
諸臣併力圖之及稱都督何卿沈希儀年老力衰神
昏智怠均之無益實用所當罷黜各一節具見本官
急於討賊之義緣前項屯住之賊節該臣等題奉
欽依刻期進剿至今未見蕩平近據侍郎趙文華謂草茂
水深正在會處况督察督撫巡按一時俱在松江賊
此殘寇而後朝食各官忠盡之志諒亦相同伏望
皇上特降嚴旨令其同心戮力早成擒俘之功以靖地方

以絕後患如或因循觀望坐失事機聽督察巡按官
從實糾奏不許畏避有誤大計其何卿之在川蜀沈
希儀之在兩廣俱素著威名乃今一籌不展輿論共
棄若果年力衰邁情由可原如或懷奸避難故作無
能之狀以覲安便之圖則是忍心害理罪不容誅合
無將何卿解其漸直總兵見任員缺另行推補仍將
本官都督職銜先行革去聽四川原問衙門查照彼
中事理從實體勘叅奏究治都督沈希儀已經替職
致仕虛冒國恩尤可痛惡合將都督職銜一體革
黜令其回衛閑住庶將來將領不致效尤但

恩威出自 朝廷嘉靖三十四年十月十三日題奉

聖旨是這地方殘寇着督察督撫官等作急勦殺盡絕不許玩怠何卿沈希儀都革了職級回衛閑住欽此

覆督察總督等官論陶宅等處功罪查勘疏

題爲勦獲劇賊軍情事職方清吏司案呈奉本部送兵科抄出督察軍務工部右侍郎趙文華奏奉

聖旨兵部看了來說欽此又該總理糧儲提督軍務兼巡撫應天等府地方都察院右僉都御史曹邦輔題爲仰仗 天威官兵奮勇勦除撞過留都極惡倭寇事總督南直隸浙江福建等處軍務南京兵部右侍郎

兼都察院右僉都御史楊宜題爲極悍倭夷深入內地仰仗 天威勦除已盡事俱奉

聖旨兵部知道欽此欽遵通抄送司案呈到部看得督察軍務右侍郎趙文華具奏前因大意謂陶宅鎮之賊尚未勦滅督兵親至松江劄候日久僉事董邦政故違節制趨易避難都御史曹邦輔不急民艱炫名失實皆於閫寄各昧機宜及該總督軍務侍郎楊宜題稱今革職把總婁宇調度由人斬獲功級可以准贖並邦政故違節制雖有獻馘之微功難掩養寇之重罪念在緊急之際姑令戴罪殺賊侍郎趙文華都御

史曹邦輔等功不可掩各一節臣等反覆參詳文華
所謂趨易者蓋指蘇州之寇而言所謂避難者蓋指
陶宅之寇而言緣前項二寇聲勢相倚均稱窮寇不
宜以難易槩論若使合而爲一以流剗者之強橫
屯聚者之衆多未免益復滋蔓乃今蘇州之寇勦無
孑遺陶宅之寇自是勢孤氣沮削平有日先據都御
史曹邦輔奏到董邦政等功次查得督察總督未見
會奏已經備行巡按御史查勘乃今侍郎趙文華楊
宜復有此論在軍門係干軍機若使違令而不治則
無以振肅人心在巡撫係干功賞若使有功而不錄

則無以激勵衆志事體關涉均非細故相應通行議處合候 命下將董邦政妻宇俱令戴罪務將陶宅之賊上緊勦滅事寧之日一併查議其趙文華曹邦輔等功該優錄備行巡按御史作速勘明分別具奏以憑議擬陞賞嘉靖三十四年十月十三日題奉

聖旨是欽此

覆議遼鎮義州地方功罪疏

題爲捷音事職方清吏司案呈奉本部送兵科抄出總督劉遼保定等處軍務兼理糧餉兵部左侍郎兼都察院右副都御史王忬巡撫遼東地方督理軍務都

察院右僉都御史蘇志臯征虜前將軍鎮守遼東
兵官署都督僉事殷尚賢題前事巡按山東監察御史陳瓚題為胡虜深入殘害地方辱 國殃民乞

光治失事重臣以振 國威事俱奉

旨兵部知道欽此欽遵通抄送司案呈到部看得遼東
總督鎮巡巡按等官王忬等連章具題大率言達虜
打來孫等糾合醜類突入遼東義州等處地方搶掠
人口殺傷官軍各該官兵堵截出境斬獲首級一百
四十九顆奪獲達馬三百二十四匹夷器等件數多
在總督鎮巡王忬等則歷叙各官斬獲之功在巡按

御史陳瓚則極言地方傷殘之狀要將總兵殷尚質
重究巡撫蘇志臯革任總督王忬戒飭各一節爲照
薊鎮地方自嘉靖二十九年虜患之後繹騷畿輔震
動京師事體重大比之別鎮不同以故特設重臣總
督軍務

勅內明開遼保二鎮聽其調遣無非借股肱之力爲腹心
之助所據侍郎王忬之多調遼兵乃其職任原無可
罪至於鎮巡二臣先事歎於多事臨警不能萬全委
爲失職但總兵官殷尚質節制悉由於軍門應援難
拘於專閫巡撫都御史蘇志臯雖有替理之責屢陳

兵寡之奏情俱可原况斬獲虜首多至一百四十有奇奪獲虜馬多至三百二十有奇若果不係覘報其功似亦可錄及照虜經去處殺掠之慘勢所必有兵刃相接挫衄之事似不爲虛巡按御史職司風紀因事論劾具見風裁所在必須逐一體勘的實庶幾功罪攸明勸懲斯當合候

命下將殷尚質蘇志臯姑免究治令其策勵鎮巡地方以責後效仍容臣等備咨都察院轉行彼處巡按御史速將前項賊經地方從實體勘要見斬獲首級是否真正達賊殺虜人畜若干攻毀堡寨若干殺死官軍

若干奪去官馬若干干碍副叅遊守等官從實叅奏
但 恩威出自 朝廷臣等不敢定擬嘉靖三十四
年十月二十四日題奉

聖旨是殷尚質蘇志臯姑免究着策勵供職欽此

覆都給事中丘預達等論總兵官萬表解任疏

題爲江南倭患未平乞

賜亟黜久病將臣以圖安攘事職方清吏司案呈奉本部
送兵科抄出兵科都給事中丘預達等題奉

聖旨兵部看了來說欽此欽遵抄出送司案呈到部看得
兵科都給事中丘預達等題稱新推浙直總兵萬表

衰頹不振務外不情欲要亟賜罷斥另推才略忠勇
者俾充是選一節爲照都督萬表生長海濱歷官江
介浙直之道里險夷無不周知浙直之勇士沙民多
爲依附去歲統兵與賊接戰曾中流矢軍旅之事似
亦閑習近據鳳陽巡撫都御史陳儒巡按御史吳百
朋交章力薦其賢且稱其步履雖艱運務不廢臣等
以爲撫按官與之同處一方知之必真以故題奉
欽依候缺推用尋遇浙直缺總兵官遂即會同府部科道
等官將本官推舉上請荷蒙

簡用乃今該科論其素抱荏苒不堪驅策但病之真僞未

可遙斷若候勘報至日方行處分見今倭患未平地
方正在用兵之際未免妨廢戎務相應酌處合候
命下先將浙直總兵員缺會官推補一面行移浙江撫按
將萬表從實查勘要覓是否有病即今有無痊可應
否別用具由回奏以憑覆議定奪嘉靖三十四年十
一月初四日題奉

聖旨是欽此

覆給事中夏棫等叅督察等官奏報欺怠疏

題爲殘寇復肆猖獗官兵各遭挫敗大臣欺怠不忠奏
以無實乞 賜究治以振軍威以彰

聖斷事職方清吏司案呈奉本部送兵科抄出兵科給事
中夏棧題奉

聖旨該部看了來說欽此又奉本部送兵科抄出巡按浙
江監察御史趙孔昭題爲進勦倭寇事奉

聖旨兵部知道欽此欽遵通抄送司案呈到部看得給事
中夏棧具題前因極言浙江巡撫都御史胡宗憲應
天巡撫都御史曹邦輔總督侍郎楊宜督察侍郎趙
文華欺怠不忠奏報不實要行勘處巡按浙江監察
御史趙孔昭題稱陶宅二次敗衄緣由欲要丁寧楊
宜曹邦輔胡宗憲同心協力務成大計陣亡指揮姚

泓邵昇重加褒卹各一節爲照前項倭寇屯住陶宅
未見勦滅仰蒙

聖皇在上日勤宵旰天語丁寧至再至三廼今當事諸臣
動失機宜兩遭挫衄之咎據給事中夏棻之言得於
所聞以爲奏報未至詳悉難知據御史趙孔昭之言
得於所見以爲正在督兵進勦之時功罪尚未可執
姑候事寧另行叅奏詞雖不一無非慎重功罪以勵
人心之意相應一併議擬合候

命下轉行巡按御史周如斗趙孔昭會同體勘要見陶宅
之寇實有若干各官奏報緣何不實是不欺怠彼時

應否進勦的係何人定計何官後期何兵挫敗將領
有無損傷失事有無重大作速具奏以憑覆議定奪
夏棖又謂趙文華務秉忠貞勿事掩飾督討有功與
督撫同賞委任有負與督撫同罪蓋因趙文華特膺
知眷視師一方以故責成獨至容臣等備行前去令其益
勵初忠督察必公毋安於雷同督討必慎務集乎衆
思以副

聖懷以慰地方倒懸之望其指揮邵昇姚泓死事之烈委
可嘉尚令無各取應襲兒男照例襲陞二級以示激
勸嘉靖三十四年十一月初四日題奉

聖旨是欽此

覆宣大薊遼等處總督尚書許論等獻捷陞賞疏
題爲捷音事職方清吏司案呈奉本部送兵科抄出總
督宣大山西等處地方軍務兼理糧餉兵部尚書兼
都察院右副都御史許論巡撫大同地方贊理軍務
都察院右僉都御史齊宗道鎮朔將軍鎮守宣府總
兵官中軍都督府署都督僉事歐陽安巡撫宣府等
處地方贊理軍務都察院右副都御史劉廷臣各題
爲捷音事提督鴈門等關兼巡撫山西地方兵部左
侍郎兼都察院右副都御史王崇題爲大舉達賊入

犯官軍奮勇血戰獲功報捷事總督劉遼保定等處
軍務兼理糧餉兵部左侍郎兼都察院右副都御史
王忬整飭薊州等處邊備兼巡撫順天等府地方兵
部右侍郎兼都察院右僉都御史吳嘉會題爲大虜
突至攻牆仰仗 天威官軍奮勇敢退保障京

陵重地事又該王忬吳嘉會與同鎮守薊州永平山海等
處地方總兵官前軍都督府都督同知周益昌題爲
大虜乘秋糾衆謀窺薊鎮仰仗

天威官軍勦力拒守遠道事俱奉

聖旨兵部知道欽此通抄送司卷查先爲大虜擁衆東寇

仰仗 天威嚴布官軍堵截持久遠遁功收不戰事
該總督侍郎王忬巡撫侍郎吳嘉會題稱本年二月
內虜酋把都兒辛愛打來孫諸部糾結近邊日夜爲
謀必圖一騁督率官軍極力拒守幸保無虞所據先
任總督軍務右都御史今陞兵部尚書楊博料敵明
如觀大應變決若江河威惠素孚于官軍防禦得其
死力經略曲盡于邊鄙調度中平機宜逆折初至之
鋒俾絕可乘之隙功當首論也并各該効勞人員欲
要分別等第陞賞一節該本部議照舊章醜虜自春
徂夏如果窺伺薊鎮自無虛日萬一得遂所謀未免

釋騷幾輔震動京師乃今相持數月竟保無虞徙薪曲突之功委當甄錄但即目正在防秋若使賞典一行未免人心弛縱兵驕之戒亦當深慮係于激勸相應議擬合候

命下備行王忬等明諭主客兵將以爲時當早秋各要益勵前功力收後效如果竟保無虞防秋畢日查照去春河坊口事例即當一併論叙其王忬吳嘉會周益昌更須仰思

聖明眷遇之恩下念生靈懇切之望一切邊計協心整飭聿修門戶之防用成堂室之固朝廷自有重大陞

賞所據奏抄通行案候在部另議施行等因奉

聖旨是欽此已經案候在卷通查案呈到部看得宣大薊
遼總督撫鎮等官許論王忬等交章具題前因在宣
大總督則極言官軍斬獲之功在薊遼總督則歷叙
地方保障之略臣等逐一叅詳今歲虜情委與往歲
不同粵自古北失利之後春初旣糾合醜類窺伺郊
關秋近遂分遣奸宄往來畿甸西部之虜蜂屯威寧
海子一帶經月不移東部之虜蟻聚一馬免舊大寧
一帶三時未散悖逆天道罪不容誅已而知我有備
東部者不得已而分犯遼東西部者不得已而分犯

山西又自宣府北境掩至居庸關外擁衆攻牆勢極
猖獗若使得遂狂謀利害緩急不在去秋古北之下
萬一潰牆而入臣等與邊臣萬死何足以贖乃今宣
大總督許論奮勇血戰斬獲虜首多至五百三十餘
級薊遼總督王忬多方拒守千里邊關萬無一失以
守則一矢不遺遠邁漢師以戰則一月三捷有光周
雅是豈人力所能爲哉寔由我

聖皇在上誠感上玄協百靈而助順

惠流下土罄九有以同歡尚書許論謂

道參天地治冠百王精誠一念上格於穹窿

皇極庶徵旁流於荒徼侍郎王忬謂玄貺昭靈助百萬無
形之兵甲王氣葱鬱壯山川甫繕之金湯允矣不戰
屈人偉哉萬全取勝二臣之論極爲明盡臣等待罪
本兵目擊玄功躬逢盛事不敢隱蔽伏望

聖明擇吉恭舉謝玄之典以荅玄貺

勅下禮部具儀奏請祇告

宗廟

社稷以彰我

皇上格

天紹

祖之烈臣等不勝懇切祈望之至其一時効勞諸臣雖不敢貪天之功以爲己功既該各官具題前來係于激勸似當分別酌議在外宣力之臣如總督宣大山西等處軍務兵部尚書兼都察院右副都御史許論深憤狂虜之憑陵躬冒矢石而膚功屢奏總督薊遼保定等處軍務兵部左侍郎兼都察院右副都御史王忬惟恐郊圻之震動心懷忠藎而壯略獨閑在論則當錄征戰之功較之威寧柳溝真不多讓在忬則當錄保障之功比之河坊古北猶爲過之以上二臣合無超格陞賞仍爲廕叙整飭薊州邊備兼巡撫順天

兵部右侍郎兼都察院右僉都御史吳嘉會鎮守薊
州總兵官都督同知周益昌忠勤廉靖戮力同心共
成薊鎮萬全之功至於昌平唐兒庵之役先時謹飭
邊備臨警調度兵機則吳嘉會之勞尤難槩論巡撫
大同都察院右僉都御史齊宗道特無總兵獨當邊
寄據其朔州劫營之績不減許論若謂虜自左衛而
入既無可拒之牆塹又無可恃之兵馬則獨苦之心
亦當特亮以上三臣合無同加陞廕鎮守宣府總兵
官署都督僉事歐陽安巡撫宣府都察院右副都御
史劉廷臣虜之出入雖悉由本境決旬調度竟成擒

斬之功提督鴈門等關兼巡撫山西兵部左侍郎兼
都察院右副都御史王崇慶之出沒雖不能周全連
歲區畫難掩勤勞之績總督尚書許論謂歐陽安力
過猖狂之勢劉廷臣多資保障之功巡按御史劉應
熊亦謂王崇經理不遺餘力合無將歐陽安准復
原降職級劉廷臣准復俸級王崇量加陞俸仍各加
恩資統論各該將領兵備諸臣如代領大同總兵官正兵
協同鎮守大同左副總兵官田世威暫領宣大總督
軍門標兵分守大同東路叅將馬芳統領宣大總督
軍門標兵遊擊將軍劉環軍門標兵營把總胡鎮補

兒害葛柰拜言兔王孟夏宣府巡撫都察院標下把
總王林身經百戰驍雄特冠乎三軍分守鎮邊城叅
將張堅密雲兵備叅政李泰朔州兵備副使楊順昌
平兵備僉事馬珮功底萬全保障獨難于諸鎮以上
十三員合無超格陞賞內張堅父子遇虜尤爲卓越
似應別為廕叙以示優異鎮守昌平副總兵祝福堅
守一隅拒堵甚力合無量加陞賞宣大副總兵張琮
叅將尚表張勲遊擊趙臣李章劉漢張問政軍門標
下把總趙鎮馮大威朔州守備周卿宣府中軍指揮
陳鎮李尚文監生楊汲義勇趙倬弋仁摧鋒陷陣聿

成倅敵之勲宣大軍門中軍官曹鎮前遼軍門中軍
官張倫執銳披堅汛掃妖氛之氣以上一十七員合
無重加陞級內張倫仍照王忬等所擬并節次軍功
改授武職薊州兵備副使趙忻副總兵吳珮羅文彖
叅將楊照蔣承勲武勲線世祿劉淮遊擊尹秉衡許
崇王允中張璣張九思楊舟李洲河南民兵叅將胡
永錫僉事陳夢鶴山東民兵叅將唐玉副使張祉原
任叅將陸禎張元勲蕭寶見任守備盧枏詹承恩張
紹祖李康民分守信地竟保無虞遼東副總兵王重
祿遊擊胡克勲閭懋官羅九臯延固宣大遊擊陳言

孫邦馮大綸孫時謙李嵩楊世臣胡朝往來應援軍
聲丕振以上三十七員合無量陞職級內陸禎等仍
遇缺推用原任總兵官吳鼎等二十員咸知使過之
義均成敵愾之功合無厚加賞賚內閑住者附簿酌
量叙用充軍者免其發遣就留軍門立功其吳鼎功
不滿數相應紀錄以俟併論原任提督軍務今改大
同總兵官趙卿原任分守密雲今陞保定總兵官龍
業見任提督軍務署都督僉事蕭漢宣大叅將翟欽
等十一員兵部主事桂嘉孝宣大管糧郎中睢明才
黃辰薊州管糧郎中高光昌平主事龔鍊密雲主事

劉曾生冀北道守巡叅議薛騰蛟僉事莫璿口北道
守巡叅議張鎬朱笈大同知府郭邦光薊州巡撫中
軍官毛紹忠宣府叅將張縉或總理糧餉或整飭邊
防或領兵策應均效勤勞合無量加賞賚宣大都指
揮等官徐枝等十八員軍門鎮巡旗牌頭目等官張
世勲等六十一員朔州知州吳應軫隨軍管餉河南
府同知孫芮密雲管糧通判洪溉居庸分守等官吳
守直等十二員原任副叅遊守等官童陞等三十一
員千把總中軍等官周乾等一百二十八員監督旗
牌等官張書紳等四十二員或執旗督陣或監視工

程或收保有方或防守無失勞亦可錄合無備行各
軍門動支官銀分別犒賞各該報捷人員羅相等七
員名照例陞賞宣大軍門標下通事軍丁并遊擊官
軍轉戰千里晝夜未嘗解甲薊州昌平守牆應援官
軍勞苦經年風雨尤為荷戈合無俯就許論王忬所
請於太僕寺馬價內動支二萬五千兩內五千兩發
許論二萬兩發王忬令其徑自分別賞勞事完造冊
奏繳各該督撫總兵下今典掾史徐文等十名均有
書辦之勞合無與同本部經該吏役容臣等另行查
議薊鎮被殺夜不收郭大兒等四名昌平陣亡軍人

郝堂等三名殞身鋒鏑情亦可憫合無比照古北口陣亡軍人張馬馬等事例各陞百戶世襲大同山西失事叅將王鈺等并宣大獲功陣亡被傷官軍備行各該巡按御史覈實具奏誤事人員併行叅究巡按御史李鳳毛黃國用兵科都給事中丘預達等格于近例不敢槩議但御史于業何廷鈺職司巡關王忬謂其勅法戒嚴應否褒錄取自

上裁合無量加

恩賚以酬其勞在內宣猷之臣如大學士嚴嵩徐階李本夙夜寅清力替駕恭之化朝夕獻納坐收安攘之功

內嚴嵩元老壯猷勞勩多年尤當特論合無各加陞
廕成國公朱希忠安平伯方承裕左都督陸炳吏部
尚書李默禮部尚書王用賓同寅畏以贊玄各協恭
而體 國內陸炳加意邊陲預伐虜謀其功茂著合
無各加陞賞撰文吏部侍郎郭朴等五員久從事於
清華每區畫於邊計合無厚加賞賚總督京營戎政
鎮遠侯顧寰協理戎政兵部右侍郎謝九儀志切籌
邊軍聲丕振戶部尚書方鈍總督太倉戶部右侍郎
盧紳憂先 國計士氣歡騰合無各加賞賚但

恩典出自

朝廷嘉靖三十四年十一月初六日題奉

聖旨秋防事畢邊臣堵截斬獲効有功勞許論加太子太保尚書兼官仍舊王忬陞右都御史兼兵部左侍郎各廕一子與做正千戶吳嘉會陞二品服俸周益昌陞右都督各廕一子副千戶齊宗道陞右副都御史歐陽安劉廷臣准復原降級俸王崇廕一子副千戶田世威等各陞二級張堅陞都督同知廕一子百戶以上俱照舊總督鎮巡廕官俱填註原籍衛所李綦陞按察使楊順右叅政馬珮右叅議俱照舊兵備張琮等各陞一級張倫准改武職祝福并趙忻等各陞俸一級吳鼎等各賞

銀二十兩趙卿等各十五兩徐枝等各該總督軍門分別犒賞奏捷人員各陞一級賞軍銀兩准給發郭六兒等照例陞級王鈺等巡按御史查明具奏楊博加太子少保廕一子入監讀書翁溥沈良才各陞俸一級賞銀二十兩宋國華陞俸一級顧寰謝九儀方鈍盧紳各賞銀二十兩二表裡于業何廷鈺各十五兩一表裡其餘依擬告謝

宗廟

社稷恐替本仍首謝

元也爲禮欽此

謝加太子少保廕子疏

太子少保兵部尚書臣楊博謹

奏爲恭謝

天恩事近因秋防事畢邊方底寧荷蒙

聖恩加臣太子少保廕一子入監讀書隨該臣具疏辭免
奉

聖旨加恩已有成命了不允辭吏部知道欽此欽遵除赴
鴻臚寺報名

廷謝外臣不勝隕越不勝感戴謹稽首頓首陳謝者伏以
皇威震疊坐收全勝之功

帝德含弘晉錫特降之典寵膺宮保深愧躡榮慶衍章綏
更慙裕後感深肌骨報乏涓埃恭惟

皇上道合重玄誠孚大素干羽之舞復見虞廷撻伐之威
重光周雅燕雲並捷歡聲雷動於寰中植薊齊寧喜
氣風行乎塞外信非人力實出

天功臣本以寒素游歷清華往在邊陲未建修攘之効頃
叅樞府徒懷瘼曠之憂詎期駕賢載荷

鴻私官聯東觀彌親

日月之光華裔出西秦益覺

乾坤之浩蕩遜避弗能驚惶莫措臣敢不早夜服官獨竭

驚駘之力晨夕教子同輸葵藿之忠惟有赤心相期
皓首伏願

帝圖天廣

聖壽日升永奠中華致五兵於不試廓清朝漠合萬國以
來王臣無任受

恩感激屏營悚息之至嘉靖三十四年十一月十四日奏
奉

聖旨覽卿奏謝知道了禮部知道欽此

覆給事中孫濬申明督察督撫等官事權疏

題為搗除賊巢事職方清吏司察呈奉本部送准吏部

咨該吏部等部會題先該督察軍務工部右侍郎趙
文華題叅總督楊宜等又該吏科給事中孫濬題為
懇乞

聖明慎更易專責成以圖實効以靖地方事俱奉

聖旨吏兵二部看了來說欽此覆議得孫濟題稱事權歸一責成既專自無彼此牽制之患方今督察司稽課而戰守大機當決之總督巡撫兼提督而行伍專職當責之總兵督撫統大綱而城池倉庫奉行策應當付之有司不然權分勢軋人皆掣肘無以自售其長欲下該部申明事權督率不嚴方略不慎罪坐總督

錢繼不敷調遣無法罪坐巡撫戰陣退縮馭士委靡
罪坐總兵策應不前境內殘破罪坐郡縣檢察無實
功罪不明或昧機專斷征見強人以致挫敗罪坐督
察蓋欲明事權以便責成尤為有見合無仍從兵部
查照原擬責任與孫濟前項所議斟酌停當上請
宸斷勅下各官遵奉施行則兵權歸一事體不紊而東南
兵患庶或可以消弭矣等因題奉

聖旨是曹邦輔姑准存留策勵供職與楊宜協心平賊不
許致快事機欽此咨部送司案呈到部看得吏科給事
中孫濟具題前因無非因殘寇未平委任責成之意

查得各官原擬職任督察主於竭忠討賊從實奏報
總督主於調度官軍指授方略巡撫主於提督軍務
措處糧餉總兵主於設法教練身親戰陣至於有司
之責在於保安地方固守城池既經吏部移咨前來
相應通行申飭合候

命下本部備行督察總督巡撫總兵等官各照

勅諭事理并孫濬所議一體遵行其稱督率不嚴方略不
慎錢糧不敷調遣無法昧機專斷徇見強人各官身
任大臣與有安危之責不惟不當為之亦必不忍為
之但事在彼中俱候巡按御史查勘至日具奏定奪

嘉靖三十四年十一月二十一日題奉

聖旨是欽此

覆光祿寺卿章煥條上平倭方略疏

題爲極陳倭情防遠患以圖久安事竊方清吏司案呈奉本部送兵科抄出光祿寺卿章煥奏奉

聖旨該部看了來說欽此欽遵抄出送司案呈到部看得光祿寺卿章煥具奏前因反覆敷陳不下千言大率欲築城繕堡增設縣令至於所言未安八事俱有條貫乞要查議一節爲照嘉靖爾倭奴侵擾浙直已逾三年在彼則以奇貨視我條來條去未聞掃蕩之期在

我則以殘寇視彼或作或息不見修攘之效要之南
倭與北虜事體不同北虜雖蜂屯蟻聚出沒有時南
倭則鬼術神奸操縱難測寺卿章煥生長吳中且目
擊其患以故極口論列憂之其切處之甚詳臣等竊
惟經理海防有善後之良圖有目前之急務調兵遣
將以殄遺孽此急則治標之義繕堡增官以培元氣
此緩則治本之義但江南守令自

祖宗以來建置已定一旦欲以一縣分四且數令事體重大
即如青浦一縣議之數年方成尋以不便又復裁省
若處處添令臣等誠不敢輕議至於崇築城堡并添

內條列事宜戰守均為有益相應議擬酌處合候
命下備咨總督侍郎楊宜巡撫都御史曹邦輔胡宗憲將
本官所奏八事逐一從長計議要見如何統兵馭兵
調兵募兵如何練兵屯兵行兵養兵務要去其弊端
求其實效逐一具由回奏一面備查沿海地方原前
有何墩堡即今有無見在應該如何處修合用錢糧
或南京兵部或廣東福建諸省有何官銀可以借支
明白奏請其民間城堡擇其要害去處着落府州縣
掌印等官省令居人自行隨便脩築雖不能如邊牆
周匝拒之使不得入有一城則有一城之利有一堡

則有一堡之利其不可修築去處亦不必一聚強民
致生嗟怨嘉靖三十四年閏十一月十五日題奉

聖旨准議欽此

覆督察侍郎趙文華等報新倭合寇督勦疏

題爲奏報軍情事職方清吏司茶呈奉本部送兵科抄
出督察軍務工部右侍郎趙文華奏前事總督南直
隸浙江福建等處軍務南京兵部右侍郎兼都察院
右僉都御史楊宜題爲飛報緊急賊情事俱奉

聖旨兵部知道欽此又該巡按直隸監察御史邵惟中奏
爲宿寇未除新冠日至懇乞嚴飭督撫諸臣申明戰

守事宜以靖地方事奉

聖旨該部看了來說欽此欽遵通抄送司案呈到部看得
督察軍務工部右侍郎趙文華總督軍務南京兵部
右侍郎楊宜巡按直隸監察御史邵惟中交章奏題
前因大率言宿寇未除新賊日至聚泊川沙窪一帶
深入擾害亦所難料以臣等愚見倭奴之來也以春
其去也以秋乘風潮之便以為出沒乃今十月以後
舟艘漸多此必向來之寇因見官兵四集潛住海島
既而緩我日久又復突至若使延入春深呼朋引類
未免益復滋蔓御史邵惟中欲要嚴飭督撫諸臣申

明戰守以責實效深為有見但制勝之事在於兵將
用兵之機貴於協同即今四川湖廣山東之兵以次
俱到虎旅雲集正一鼓擒賊之時在趙文華則謂賊
雖稱衆不及客兵數倍欲行進剿奏捷

闕廷在楊宜則欲十圍五攻因敵設策通候獲功另行
具奏其氣甚壯臣等無容別議伏望

皇上天語叮嚀諸臣并總兵官劉逮副總兵俞大猷何卿
無以小勝為得務成萬全之策無以少敗為挫力求
汎掃之計謀斷相資以先國家之急將相和調以
拯生靈之患功成之日自有殊典若仍復失事

國典具存無詞可諉其邵惟中所言揀選民兵一事節
經本部題奉

欽依要之提綱挈領全在兵備合無嚴行蘇松叅政任環
常鎮副使王崇古加意整飭本部咨行吏部照依蘇
州熊桴事例於松江府添設同知一員專管民兵其
日省月試季報歲報事宜悉如今議施行邵惟中又
欲各省撫按衙門自叅遊以至千百戶等官自武舉
以至舍人總小旗等項求其年力相當謀勇素著者
一省各舉數人起送軍門以充偏裨把總操巡等項
應用無非廣收群策群力之意合無備行西北各鎮

撫按官不拘見任閑住充軍為民各另查舉起送赴部酌量選用內甘肅寧夏固原相去太遠不必一槩混舉嘉靖三十四年閏十一月二十二日題奉

聖旨這奏內宿寇未除新賊日至地方何時得寧楊宜等着協心設謀剋期蕩平如再坐視悞事重罪不宥其餘依擬欽此

覆督察侍郎趙文華區處海防請下督撫勘議疏題為奉

勅區處海防因地制禦事職方清吏司案呈奉本部送兵科抄出督察軍務工部右侍郎趙文華奏奉

聖旨兵部看了來說欽此欽遵抄出送司案呈到部看得
督察軍務工部右侍郎趙文華具奏區處海防三事
在松江則主於守在浙江則主於攻在福建則主於
撫三者並行可以制勝不窮臣等反覆參詳要之三
省地方戰守相須撫勦兼用不可偏廢本官欲為善
後之圖以故各舉所重而特言之其言松江之守大
率要召集鄉民且耕且守令熟知土俗閒致鄉官俾
領其事但鄉官原無事權又非督撫諸臣所當管攝
彼此意見不同將來反致掣肘合無備行巡撫都御
史曹邦輔會同巡按御史再查彼處果有逃民田土

許其召人承種三十畝出兵一名止免雜差審據人情願與不願徑自酌處施行如果原主復業聽其自種中間別有窒礙不必依違明白回奏其言浙江之戰因食於地而食自充大率欲於福寧山溫州南紀東落中界大小門山台州玉環山玉山寧波九山周圍塗地不下百十萬畝開墾漸廣養兵奚啻萬人是亦一策但不知有田無田令無備行浙江巡撫都御史胡宗憲會同巡按即查前項地方如果有田可耕設法召人也種量地給兵或五十畝或百畝其立所設司水寨船哨等項應否查復舊制贊之人情詢之

土俗從實議奏其言福建之撫大率欲要暫設經略
總督專官彼地嚴為譏察所調用海船實貨編號以
次挨放助裝充餉惟無號者禁捕之其直隸提督管
直隸軍門之事浙江提督管浙江軍門之事不逼不
躐事乃可理緣時方用兵吏置官守恐非其時合無
將福建譏察事宜嚴行該管漳泉兵備副使悉心經
理督撫官悉心綜核務臻實效其餘事宜候地方稍
寧侍郎楊宜會同撫按官從長會議具奏嘉靖三十
四年閏十一月二十六日題奉

聖旨是欽此

覆南京兵部尚書張鏊等請定營名疏

題為恭請

欽定營名以飭武備以裨安攘事職方清吏司案呈奉本部送兵科抄出南京兵部尚書張鏊等題奉

聖旨兵部知道欽此欽遵抄出送司案呈到部看得南京兵部尚書張鏊等題稱要將新設二營擬名

欽定一節為照南京前項二營在都督段堂統領者則為防守京城在豐潤伯曹松統領者則為拱護

陵寢事體均屬隆重但無營名似為未便伏望

聖明特賜裁定頒示本部移咨該部欽遵施行嘉靖三十

四年十二月初一日題奉

聖旨營名與做振武欽此

奏報蘇松等處征倭獲功疏

題爲擒斬倭寇事職方清吏司案呈奉本部送准總督
南直隸浙江福建等處軍務南京兵部右侍郎兼都
察院右僉都御史楊宜揭帖前事等因送司案呈到
部臣等看得蘇松之倭其一在周浦其二在川沙窪
盤據日久極為地方之害在周浦者近該川兵搗其
巢穴掃蕩一空在川沙窪者畏我兵威相繼開洋督
察侍郎趙文華總督侍郎楊宜巡撫都御史曹邦輔

又復督率兵將邀之海中斬獲甚多餘賊自焚其舟
奔入浦東除嚴行各官乘勝勦殺務期削平以慰

聖心外嘉靖三十四年十二月初十日題奉

聖旨知道了欽此

會議監察御史徐棻請命廷臣條上平倭方略薦
舉人才疏

題爲東南用兵日久督撫將臣數易無功懇乞

聖斷博資才略以備安攘大計事吏科抄出南京湖廣道

監察御史徐棻奏奉

聖旨該部看了來說欽此欽遵抄出送司案呈到部臣等

會同太子少保吏部尚書兼翰林院學士臣李默等
看得南京湖廣道監察御史徐弼具奏前因大率欲
要會議平倭長策會舉文武長材其意甚善其論其
詳臣等切惟倭奴為患積有歲年仰蒙

聖皇在上軫念東南時勤宵旰調兵遠及於川廣徵需不
遺乎椒木即如增官設將築城建堡一切事宜或因
言官之建白或因本部之議請

乾剛離照悉賜允行頃者當事諸臣雖將周浦川沙窪之
賊統兵勦殺目前一勝之功不足深恃春來萬全之
略急當預圖所據御史徐弼所陳二事一欲廣集衆

思使群策畢陳一欲博收人望使群力畢舉三年之
艾自今畜之委為可及相應通行議擬合候

命下移咨在京府部院寺各衙門堂上及科道等官但有
裨於禦倭或軍中機宜或民間利病或應守要害或
未明職掌或鄉兵作何訓練或客兵作何調用或錢
糧作何處給不拘一事二事通限半月以裏各令悉
心條奏兵部逐一叅酌果有前時未及敷陳即今亟
當釐正者以次覆奏恭請

聖裁至於薦用文武材略之臣以濟時艱均為要務通行
在京三品以上大臣不論見任休致侍養及因公註

誤人員但不係考察罷斥者如果德望素孚兵戎諳練每一衙門疏名會薦文職聽吏部武職聽兵部各查訪相同遇缺酌量叙用仍咨南京兵部轉行彼處官備陳所見訪舉所知一體星馳具奏嘉靖三十四年十二月十一日題奉

聖旨是欽此

覆宣大總督尚書許論等招徠降人疏

題爲招降事職方清吏司案呈奉本部送兵科抄出總督宣大山西等處地方軍務兼理糧餉太子太保兵部尚書兼都察院右副都御史許論等題奉

聖旨兵部知道欽此欽遵通抄送司卷查先該總督宣大山西軍務尚書許論題為走回人口供報夷情懇乞天恩嚴行擒捕妖逆以拔禍本事本部議擬生員張蕙忠義可嘉總督官先賞銀三十兩仍授以附近衛所所鎮撫之職就留置軍門隨宜委用覆題奉

聖旨是張蕙准授所鎮撫欽此已經通行去後今該前因查呈到部看得大同總督撫鎮等官尚書許論等題稱督同副使楊順副總兵官田世威多方誘聞差把總旗牌官役郭葆等各詣沿邊如意招徠而王安素在丘富帳下使用聞招來歸志即可嘉祝希孟原係

周原送回試我之人未見誠偽乞要將王安照例少加恩典郭葆等量行犒賞祝希孟先行量加優恤俟周原果能束身來歸另行併議各一節查得招降之舉原為勦除首惡潛消禍本今據所奏王安雖係脇從之徒一旦向道回心束身歸命交與張蕙事體相同但祝希孟係周原使來之人中間情節難保其終既該總督鎮巡等官會題前來招致之始不妨從厚相應通行議擬合候

命下將王安授以附近衛所所鎮撫之職移咨許論動支官銀三十兩給賞就留軍門隨宜委用仍將郭葆等

分別犒賞祝希孟量加優恤以後周原如果來降別
無詐假另行一併具奏嘉靖三十四年十二月十三
日題奉

聖旨是欽此

議已故右都御史張岳軍功錄廢疏

題為比例陳情懇乞 天恩叙勞錄廢以圖補報事職
方清吏司案呈准吏部驗封清吏司手本奉本部送
吏科抄出福建泉州府惠安縣民張寯奏奉

聖旨該部知道欽此粘連原抄送司查得嘉靖二十年六
月該叅贊軍務兵部尚書毛伯溫題稱叅政張岳疏

征安南統督效勞分理有功該本部覆題節奉

聖旨張岳陞俸一級賞銀二十兩紵絲二表裏欽此嘉靖二十一年正月該提督兩廣軍務右都御史蔡經題稱叅政張岳督兵征勦廣東崖州黎寇斬獲首級二千餘顆該本部覆題節奉

聖旨張岳賞銀三十兩紵絲二表裏還陞俸一級欽此嘉靖二十五年三月該提督兩廣軍務都御史張岳題稱征勦德慶封川賊寇斬獲首級二千五百七十四名顆該本部覆題節奉

聖旨張岳陞兵部右侍郎賞銀五十兩紵絲四表裏欽此

本年九月該提督兩廣軍務都御史張岳題稱督兵
征勦廣西柳州府地方賊寇斬獲首級四千八十四
名顆該本部覆題節奉

聖旨張岳陞俸一級賞銀五十兩紵絲四表裏欽此嘉靖
二十七年七月該提督兩廣軍務侍郎張岳題稱督
兵征勦廣西賀縣廣東連山縣等處賊巢斬獲首從
賊三千一十九名顆該本部覆題節奉

聖旨張岳陞都察院右都御史賞銀五十兩紵絲四表裏
欽此嘉靖三十二年十二月該巡按四川監察御史
王本固勘報原任總督湖廣川貴軍務右都御史繡

降兵部右侍郎今已故張岳似當寬其罪而追錄其功該本部覆題節奉

聖旨張岳准復原職欽此又查得原任總督陝西三邊軍務尚書王以旂巡撫延綏都御史張愚俱在任病故積有軍功奏行本部覆題奉

欽依各廕一子送監讀書俱經通行欽遵外今該前因通查案呈到部看得福建惠安縣民張寓奏稱伊父張岳歷陞總督湖廣川貴軍務右都御史在任病故積有軍功乞要比照張愚王以旂事例錄廕一節為照原任總督湖廣川貴軍務都察院右都御史張岳提

兵已逾十年獲功不止萬級經略之跡遍滿邊陲庶
正之聲洋溢海宇勞瘁而卒可謂以死勤事者矣既
經該司查有前例相應議擬題請合候

命下將張岳量加錄蔭以為邊臣効忠者之勸嘉靖三十
四年十二月十四日題奉

聖旨張岳既有軍功准蔭一子入監讀書欽此

覆鳳陽巡按御史吳百朋勘明原任巡撫侍郎鄭
曉等征倭軍功陞賞疏

題為仰仗 天威勦逐倭寇事職方清吏司案呈奉本
部送兵科抄出巡按直隸監察御史吳百朋題奉

聖旨該部看了來說欽此欽遵抄出送司案呈到部看得
巡按直隸監察御史吳百朋題稱江北淮揚地方有
功失事人員委官查勘是實及稱海防兵備右叅政
兼副使張景賢所當重加陞賞原任叅將喬基張恒
所當錄用而喬基陞任仍當給賞徐州兵備副使劉
天授原任揚州府知府吳桂芳淮安府知府蔡揚金
所當重加陞俸淮安府同知劉一中通州同知印宋
海門縣典史余廷舜呂四場副使李政宿州衛百戶
伯永福鎮撫呂圻邳州衛義勇官王大文所當陞賞
周家橋把總張應詔等九員所當量行犒賞淮安衛

軍罪指揮周官遽難准贖塩城所軍罪百户吳郁既免其罪仍當陞賞通州等所千户秦鵬朱雄王文高楊豸所當嚴行提問壽州衛指揮戈揚等十四員巡檢耿光庭等三員所當量行降罰東海把總楊天駿等十五員所當以功贖罪狼山巡檢尹柰伊男尹仕義所當破格褒卹贈官錄子及稱原任巡撫兵部右侍郎兼右僉都御史鄭曉所當特行甄錄各一節為照淮揚地方帶江濱海前項倭奴或南自蘇松而來連舟不絕或西自通州而來百十為群殺傷之慘遠近震驚焚劫之餘室虛燹蕩析一時將領脆弱營伍空

虛苦不足恃所賴原任巡撫侍郎鄭曉每事經畫多方調度狼山巨捷一矢不遺日照逋奴片旄未返臺中之薦揚累牘連編民間之歌頌塞衢盈道比之江南得不償失者迥不相同相應首論叅政張景賢副使劉天授宣猷宣力並著勤勞而張景賢之功尤當特論其餘有功叅將張恒等有罪千戶秦鵬等并死事巡檢尹奈既該巡按直隸監察御史吳百朋勘明奏報前來斟酌重輕俱已允當內喬基雖經革任功亦難泯相應通行議擬合候

命下將鄭曉厚加陞賞仍與錄蔭張景賢重加陞賞張恒

附簿錄用與喬基各加賞資劉天授吳桂芳蔡揚金
量陞俸級劉一中印宋余廷舜李政伯永福呂圻各
量加陞級王大文授以附近衛所所鎮撫張應詔等
九員聽巡撫官分別犒賞周官免其發遣軍門聽用
吳郁免其軍罪仍加陞級秦鵬朱雄王文高楊彥并
耿光庭等三員通行巡按御史提問具奏指揮戈揚
等十四員名量加降級把總楊天駿等十五員名免
其究問陣亡巡檢尹柰優為贈官查給官殮銀五十
兩伊男尹仕義照例給與冠帶免其雜差嘉靖三十

四月十四日題奉

鄭曉陞二品服色俸級賞銀三十兩紵絲二表裏
賢陞一級銀二十兩一表裏張恒喬基各賞銀二十
兩劉天授等陞俸一級劉一中等各陞一級王大文准
與做所鎮撫張應詔等巡撫衙門分別犒賞吳郁陞一
級秦鵬等耿光庭等巡按御史提了問戈楊等各降一
級楊天駿等免究尹柰准贈光祿寺署丞伊男仍給與
冠帶其餘依擬欽此

覆給事中徐師曾等查究川兵戕殺江西護官疏
題為敷陳末議酌處川兵殺掠事宜以昭憲典以弭變
亂事職方清吏司案呈奉本部送兵科抄出兵科給

事中徐師曾題奉

聖旨兵部知道欽此查得先於兵科抄出巡撫江西等處
地方都察院右僉都御史蔡克廉巡按江西監察御
史高鏞各題為川兵逞兇殺死護送武職官員事奉
聖旨該部知道欽此欽遵通抄送司案呈到部看得前項
川兵多係蕃落之種獷悍難制乃今經過九江虜掠
船隻殺死職官明法勅罰自難輕縱在給事中徐師
曾則欲專治造意之人在撫按官蔡克廉高鏞則欲
查究為首之徒以臣等愚見律以殲厥渠魁之義二
者均不可赦至於寬假脅從以安反側之心誠為有

見相應通行依擬合候

命下移咨總督侍郎楊宜督同副總兵何卿務將首惡之人不分造意下手密切訪拿明實監候奏請以憑覆議大率多不過三四人一面宣布朝廷德意以為群愚無知姑不深究各要努力殺賊以報

聖恩不許互相驚疑自干重典其餘事焦希程遊擊曹克新鈐束無方均屬有罪合無重加罰治嘉靖三十四年十二月十七日題奉

聖旨是焦希程等各罰俸三箇月欽此

覆巡撫應天都御史曹邦輔條陳兵食事宜疏

題爲議處地方時務事宜以裨安攘事職方清吏司案呈奉本部送兵科抄出總理糧儲提督軍務兼巡撫應天等府地方都察院右僉都御史曹邦輔題奉

聖旨該部知道欽此欽遵抄出送司案呈到部看得巡撫應天都御史曹邦輔具題三事大率欲請軍餉以成足兵足食之功固海防以收地利人和之効本官身任地方之責兵馬錢糧皆其職掌慮軍門之供億各省徵解不前憤我兵之敗衄沿海隄防久廢當事諸臣各執意見每生異同以故兵戎倥偬之中有此論列但就三事而論之錢糧爲急所據奏留明年起運

銀四十四萬餘兩并要嚴催原奉

欽依各省借支及提縮均徑銀兩委不容緩伏乞

勅下該部速為通融議處共濟時艱其過患以海備為上
變虛怯為強實三事均為禦倭要務合就開立前件
議擬上請伏乞

聖裁嘉靖三十四年十二月二十三日題奉

聖旨准議行錢糧着戶部議處來說欽此

一日過患以海備為上臣等有得都御史曹邦輔議
過患以海備為上一節深得捍外衛內以逸待勞之
意但欲於海塘加築女牆誠恐地里延袤既難於成

軍民鮮少又難於守且春夏之交南方雨水連綿泥土潤濕甚易傾頽虛費徒勞似難輕舉至於立墩設鋪列營置寨此係修復

祖宗舊制即今錢糧未敷餘孽未殄姑待稍寧之日另議其餘水路把守之制區別甚明合無悉如所議施行一曰變虛怯為強實臣等看得都御史曹邦輔議變虛怯為強實一節極言東南水澤之鄉我兵涉水過港直迫賊巢至則無以展足衆不能持久而陷於進退維谷之地欲要臨機應變以圖萬全可謂得其肯綮本官又謂主帥和於上然後士卒和於下此誠端

本清源之論合無備行督撫副叅等官俱要虛心為國協和共事將挫不動浮言不惑機宜欲秘功罪欲明以鼓三軍之氣以收萬全之功其臨機決策悉如所議施行

覆督察侍郎趙文華等切青督撫平倭疏

題爲奏報軍情事職方清吏司案呈奉本部送兵科抄出督察軍務工部右侍郎趙文華奏奉

聖旨兵部知道欽此又該巡按直隸監察御史周如斗題爲狂寇離巢出海又復登岸兵將失事乞

賜戒責督撫諸臣以圖後效以安地方事奉

聖旨兵部看了來說欽此又該總督南直隸浙江福建等處軍務南京兵部右侍郎兼都察院右僉都御史楊宜題為夷兵臨陣退縮致傷官軍事奉

聖旨兵部知道欽此欽遵通抄送司案呈到部看得督察軍務侍郎趙文華巡按直隸監察御史周如斗總督軍務侍郎楊宜各具題前因大率言川兵近日挫劒之故侍郎趙文華則欲叮嚀督撫大臣土兵到日精明紀律以收全勝在御史周如斗則欲將侍郎楊宜都御史曹邦輔量加戒飭遊擊曹克新量行究治陣亡千戶李燦百戶鄭彥昇量行褒錄在侍郎楊宜則

欲將李燦鄭彥昇贈官陞襲退回之兵若果不能强
留理論遣歸遊擊曹克新可為勇將以功免究留用
為照前項倭奴盤據周浦川沙窪一帶日益滋蔓時
出剽劫每勤

聖皇宵旰之懷深切生靈荼毒之害各該官兵一戰于周
浦賊巢一空再追于川沙窪賊舟飛遁三邀于寶山
海中賊膽斯寒若使度勢審機不輕舉動蕞爾窮寇
自當坐收全功顧乃止知欲速之成全無臨事之懼
致使川兵旋敗幾棄前功雖兵之勝負不可為常而
衆之死生難以辭責但今兵力四集合謀進剿寔惟

其時御史周如斗謂人心之屬望方殷地方之機宜甚亟侍郎趙文華又揭稱閏月二十六日山東之兵設伏浦東屢戰屢捷賊計窘迫蕩平可期若果不虛其事又在川兵失利之後伏望

皇上俯從御史所議將楊宜曹邦輔嚴加戒飭令其益奮忠勇廣收群策量敵而進毋輕試賊鋒相機而動毋重墮賊計務期一鼓勦滅以成萬全之功其川兵應留應放聽總督官徑自便宜處置原任遊擊曹克新既稱勇將姑免究治仍留軍門委用以贖前罪陣亡千戶李燦贈指揮僉事試百戶鄭彥昇贈副千戶仍

移文各該衛所將應襲兒男保送赴部照例襲陞嘉靖三十四年十二月二十四日題奉

聖旨是楊宜曹邦輔着策勵設謀平賊不許怠悞曹克新姑免究李燦鄭彥昇贈官陞襲俱依擬欽此

覆宣大巡按御史李鳳毛優錄家丁董一奎疏

題爲大舉達賊入境搶掠官軍堵截不敢南下恭慰

聖懷事職方清吏司案呈奉本部送兵科抄出巡按直隸監察御史李鳳毛題奉

聖旨這所奏董一奎獲功奇偉便當嘉獎爲勸兵部看擬來說欽此欽遵抄出送司案呈到部臣等看得前項達

虜擁衆數萬突入宣府境內明係乘我不備意在深入各該官兵乃能極力堵截不使南下真足以仰慰聖皇宵旰之懷內家丁董一奎既該御史李鳳毛題稱斬獲酋首功委異常相應先行嘉獎以示激勸合候

命下將董一奎授以百戶職銜填註附近衛所仍行總督軍門賞銀一百兩令其領兵殺賊以圖後效其餘有功官軍候巡按御史覈勘至日另行具奏陞賞嘉靖三十四年十二月二十六日題奉

聖旨是董一奎准與做百戶賞銀一百兩欽此

楊襄毅公本兵疏議卷三終